

**BOSNA I HERCEGOVINA**

*Konkurencijsko vijeće*



**БОСНА И ХЕРЦЕГОВИНА**

*Конкуренијски савјет*

### **Zaključak**

**o odbacivanju Prijave namjere koncentracije privrednog subjekta Delta Holding d.o.o. Beograd, Vladimira Popovića 8A, 11070 Novi Beograd, Republika Srbija koja se odnosi na kupovinu 99,81% osnovnog kapitala u privrednom subjektu Atled d.o.o. Beograd, Vladimira Popovića 8A, 11070 Novi Beograd, Republika Srbija**

**Sarajevo  
avgust, 2023. godine**



Broj: UP-04-26-1-015-12/23  
Sarajevo, 10.08.2023. godine

Na osnovu člana 25. stav (1) tačka e), člana 42. stav (2), a u vezi s čl. 12., 14. i 16. Zakona o konkurenciji («Službeni glasnik BiH», br. 48/05, 76/07 i 80/09), a rješavajući po Prijavi namjere koncentracije privrednog subjekta Delta Holding d.o.o. Beograd, Vladimira Popovića 8A, 11070 Novi Beograd, Republika Srbija zaprimljenoj pod brojem: UP-04-26-1-015-1/23 dana 08.05.2023 godine, Konkurencijsko vijeće, na 124. (stotinudvadesetčetvrtj) sjednici održanoj dana 10.08.2023 godine, je donijelo

### **Z A K L J U Č A K**

1. Odbacuje se Prijava namjere koncentracije privrednog subjekta Delta Holding d.o.o. Beograd, Vladimira Popovića 8A, 11070 Novi Beograd, Republika Srbija koja se odnosi na kupovinu 99,81% osnovnog kapitala u privrednom subjektu Atled d.o.o. Beograd, Vladimira Popovića 8A, 11070 Novi Beograd, Republika Srbija radi nepostojanja obaveze prijave, u smislu člana 14. stav (1) Zakona o konkurenciji.
2. Obavezuje se privredni subjekt Delta Holding d.o.o. Beograd, Vladimira Popovića 8A, 11070 Novi Beograd, Republika Srbija da uplati administrativnu taksu u ukupnom iznosu od 1.000,00 KM (hiljadu konvertibilnih maraka) u korist Budžeta institucija Bosne i Hercegovine.
3. Ovaj Zaključak bit će objavljen u „Službenom glasniku BiH“, službenim glasnicima entiteta i Brčko Distrikta Bosne i Hercegovine.

### **Образложење**

Konkurencijsko vijeće je dana 08.05.2023. godine, zaprimilo pod brojem: UP-04-26-1-015-1/23 podnesak koji se odnosi na Prijavu namjere koncentracije privrednog subjekta Delta Holding d.o.o. Beograd, Vladimira Popovića 8A, 11070 Novi Beograd, Republika Srbija koja se odnosi na kupovinu 99,81% osnovnog kapitala u privrednom subjektu Atled d.o.o. Beograd, Vladimira Popovića 8A, 11070 Novi Beograd, Republika Srbija u smislu člana 12. stav 1. tačka b) pod 1) Zakona o konkurenciji („Službeni glasnik BiH“, br. 48/05, 76/07 i 80/09) (u daljem tekstu: Zakon).

Naknadno je putem e-maila dana 12.05.2023 godine (protokolisano pod brojem: UP-04-26-1-015-2/23 i UP-04-26-1-015-3/23) dostavljena određena dokumentacija (u neovjerenoj kopiji).

S obzirom da Prijava nije bila kompletna, Konkurencijsko vijeće je aktom broj: UP-04-26-1-015-4/23 od dana 23.05.2023 godine, zatražilo dopunu iste, te je Podnosilac prijave dana 26.05.2023 godine zatražio produženje roka za dodatnih 15 dana za dostavu traženog aktom zaprimljenim pod brojem: UP-04-26-1-015-5/23 koje mu je i odobreno aktom broj: UP-04-26-1-015-6/23 dana 29.05.2023. godine.

Podnosilac Prijave je istu dopunio podneskom zaprimljenim pod brojem: UP-04-26-1-015-7/23 (dokaz o uplati administrativne takse) dana 30.05.2023 godine, aktom broj: UP-04-26-1-015-8/23 dana 12.06.2023 godine (dostava tražene dokumentacije) i aktom broj: UP-04-26-1-015-9/23 dana 23.06.2023. godine (dostava Rješenja Komisije za zaštitu konkurencije kojim se odobrava navedena koncentracija).

Po prijemu dokumentacije Konkurencijsko vijeće je utvrdilo da je Prijava kompletna i izdao Potvrdu o prijemu kompletne i uredne Prijave, u skladu sa članom 30. stav (3) Zakona, dana 13.07.2023. godine, pod brojem: UP-04-26-1-015-10/23, te istu dostavili aktom pod brojem: UP-04-26-1-015-11/23.

Prijava je podnesena u propisanom roku u smislu člana 16. stav (1) Zakona, te uvidom u dostavljenu dokumentaciju utvrđeno je, da je uplaćena administrativna taksa.

Podnosilac prijave je naveo, u skladu s članom 30. stav (2) Zakona, da je izvan teritorije Bosne i Hercegovine, Prijavu podnio i ovlaštenom tijelu za ocjenu koncentracije u Republici Srbiji koja je istu i odobrila.

## **1. Učesnici koncentracije**

Učesnici predmetne koncentracije su privredni subjekt Delta Holding d.o.o. Beograd, Vladimira Popovića 8A, 11070 Novi Beograd, Republika Srbija i Atled d.o.o. Beograd, Vladimira Popovića 8A, 11070 Novi Beograd, Republika Srbija

### **1.1. Privredni subjekt Delta Holding d.o.o. Beograd, Vladimira Popovića 8A, 11070 Novi Beograd, Republika Srbija – Delta Holding**

Privredni subjekt Delta Holding d.o.o. Beograd, Vladimira Popovića 8A, 11070 Novi Beograd, Republika Srbija (u daljem tekstu Delta Holding ili Podnosilac Prijave), je upisan u Registar privrednih subjekata Republike Srbije pod brojem: 17156730, i u vlasništvu je privrednih subjekata sa sljedećim učešćima: (..)¹.

(..).

Pretežna registovana djelatnost privrednog subjekta Delta Holding je poresko savjetovanje, računovodstveni, knjigovodstveni i revizorski poslovi.

#### **1.1.1. Povezana društva privrednog subjekta Delta Holdinga**

Privredni subjekat Delta Holding nema povezanih društava u Bosni i Hercegovini ali je preko njegovog većinskog vlasnika Delta Investment-a povezan sa dole navedenim društvima u Bosni i Hercegovini:

- privredni subjekat Delta Agrar d.o.o. Laktaši, sa sjedištem na adresi Svetosavska 79, Glamočani, 78250 Laktaši registrovano u registru privrednih subjekata Okružnog privrednog suda u Banja Luci pod brojem (MBS): 1-14785-00 koji je u 100% vlasništvu privrednog subjekta Delta Agrar d.o.o. Beograd, Republika Srbija. Osnovna registrovana poslovna djelatnost privrednog subjekta Delta Agrar d.o.o. Laktaši je trgovina na veliko mlijekom, mliječnim proizvodima, jajima, jestivim uljima i mastima;

---

¹ Podaci predstavljaju poslovnu tajnu u smislu člana 38. Zakona o konkurenciji

- privredni subjekat Delta Real Estate d.o.o. Banja Luka, sa sjedištem na adresi Bulevar Srpske vojske 8, 78000 Banja Luka registrovano u registru privrednih subjekata Okružnog privrednog suda u Banja Luci pod brojem (MBS): 71-01-0010-08 koji je u vlasništvu privrednog subjekta Delta Real Estate d.o.o. Beograd, Republika Srbija sa učešćem u osnovnom kapitalu 25%, privrednog subjekta Astatine Holdings Limited sa učešćem od 50% u osnovnom kapitalu i privrednog subjekta Hazelvenue Limited, Limasol sa učešćem od 25% u osnovnom kapitalu Kipar. Osnovna registrovana poslovna djelatnost privrednog subjekta Delta Real Estate d.o.o. Banja Luka je iznajmljivanje i poslovanje sopstvenim nekretninama ili nekretninama uzetih u zakup;
- privredni subjekat Delta Transportni sistemi d.o.o. -DTS Banja Luka, sa sjedištem na adresi Grčka 17, 78000 Banja Luka registrovano u registru privrednih subjekata Okružnog privrednog suda u Banja Luci pod brojem (MBS): 57-01-0027-16 koji je u 100% vlasništvu privrednog subjekta Delta Transportni sistemi d.o.o. -DTS Beograd, Republika Srbija Osnovna registrovana poslovna djelatnost privrednog subjekta Delta Transportni sistemi d.o.o. -DTS Banja Luka je drumski prevoz robe;
- (...).

## **1.2. Privredni subjekat Atled d.o.o. Beograd, Vladimira Popovića 8A, 11070 Novi Beograd, Republika Srbija– Ciljno društvo**

Privredni subjekat Atled d.o.o. Beograd, Vladimira Popovića 8A, 11070 Novi Beograd, Republika Srbija registrovano je u Registru privrednih subjekata Republike Srbije, pod brojem (MBS): 17202774 (u daljem tekstu: Atled ili Ciljno društvo).

(..).

Osnovna registrovana poslovna djelatnost privrednog subjekta Atled je trgovina na veliko i malo obućom.

Privredni subjekat Atled nema povezanih niti zavisnih društava.

Privredni subjekat Atled godinama unazad ne obavlja djelatnost za koju je registrovan te ne ostvaruje nikakve prihode.

## **2. Pravni okvir ocjene koncentracije**

Konkurencijsko vijeće je u provođenju postupka ocjene dopuštenosti predmetne koncentracije primijenio odredbe Zakona, Odluke o načinu podnošenja prijave i kriterijima za ocjenu koncentracija privrednih subjekata i Odluke o utvrđivanju relevantnog tržišta ("Službeni glasnik BiH", br. 18/06 i 34/10).

Pored navedenih odredbi, Konkurencijsko vijeće se u skladu sa članom 43. stav (7) Zakona koristilo sudskom praksom Evropskog suda i odlukama Evropske komisije, kao i kriterijima i standardima iz Uredbe Vijeća EK, broj: 139/2004.

## **3. Pravni osnov predmetne transakcije**

Pravni osnov predmetne transakcije je Ugovor o pristupanju člana – poslovni broj: (...) kojeg su zaključili dana (...) godine privredni subjekat Delta Holding sa jedne strane i fizičko lice (...) kao 100% vlasnik privrednog subjekta Atled.

Na osnovu predmetnog ugovora privredni subjekat Delta Holding će steći 99,81% udjela u privrednom subjektu Atled kao Ciljnom društvu, dok će fizičko lice (...).

Navedeni ugovor predviđa obavezu privrednog subjekta Delta Holding da u zakonskom roku podnese prijavu koncentracije Komisiji za zaštitu konkurencije Srbije, te nakon dobijenih odobrenja i registracije kod nadležnog organa, Delta Holding će steći navedeni udio od 99,81% u Ciljnom društvu.

Transakcija se implementira iz razloga što je obostrani interes sanacija Ciljnog društva i stvaranje zdravog tržišnog učesnika s jedne strane i istovremeno dodatna diverzifikacija već raznovrsnih djelatnosti privrednih subjekata navedene grupacije, s druge strane. Ciljno društvo se godinama unazad nalazi u finansijskim teškoćama i bilježi gubitke, te navedenom transakcijom Delta Holding će steći kontrolu u upravljačkom smislu i nastojati da uspostavi profitabilno poslovanje Ciljnog društva u budućnosti čime će nastati novi konkurent na tržištu.

Slijedom navedenog, pristupanje privrednog subjekta Delta Holding privrednom subjektu Atled kao sticaocu udjela ima za posljedicu promjenu vlasničke strukture u Ciljnom društvu i na osnovu Ugovora o pristupanju člana privredni subjekat Delta Holding stiće 99,81% udjela u privrednom subjektu Atled, a fizičko lice (..).

Predmetna koncentracija predstavlja sticanje kontrole privrednog subjekta Delta Holding nad privrednim subjektom Atled u smislu člana 12.stav 1. tačka b. pod 1. Zakona.

#### 4. Obaveza prijave koncentracije

Obaveza prijave koncentracije privrednih subjekata sa sjedištem u Bosni i Hercegovini, u smislu člana 14. stav (1) pod b) Zakona, u vezi sa članom 2. Odluke o načinu podnošenja prijave i kriterijima za ocjenu koncentracije privrednih subjekata, postoji ako ukupni godišnji prihod svakog od najmanje dva privredna subjekata učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,00%.

Prema podacima iz Prijave, ukupni godišnji prihodi privrednih subjekata učesnika koncentracije (i njihovih povezanih privrednih subjekata), na dan 31. decembar 2022. godine, kao godini koja prethodi koncentraciji, iznosi:

Tabela 1.

	<b>Delta grupa</b>	<b>ATLED</b>
	<b>KM</b>	<b>KM</b>
Svijet	(..)	(..)
BiH	(..)	(..)

Izvor: Podaci iz Prijave o namjeri koncentracije

\* prihod ostvaren u BiH u 2022 godini predstavlja zbir prihoda ostvarenih od strane povezanih društava, dok je prihod Delta Holding (kao učesnika koncentracije) u BiH iznosio 0,00 KM

Godišnji prihodi učesnika koncentracije predstavljaju ukupne prihode (bez poreza na dodatnu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekata.

Privredni subjekat Atled nije imao ostvarene prihode u 2022. godini ni u BiH ni na svjetskom nivou s obzirom da godinama unazad ne posluje niti ostvaruje bilo kakve prihode.

Konkurencijsko vijeće je utvrdilo da su učesnici predmetne koncentracije ispunili uslov ukupnog godišnjeg prihoda na svjetskom tržištu, u smislu člana 14. stav (1) tačka a) Zakona te nisu ispunili uslov ukupnog godišnjeg prihoda na tržištu Bosne i Hercegovine (Tabela 1.), niti udjel od najmanje 40,0% na relevantnom tržištu, u smislu člana 14. stav (1) tačka b) Zakona.

S obzirom da nisu učesnici na relevantnom tržištu na teritoriji BiH privredni subjekat Delta Holding i privredni subjekat Atled ne ostvaruju prihode na istome te njihov tržišni udio iznosi 0%.

Budući da učesnici koncentracije nisu ispunili uslove iz člana 14. stav 1) Zakona ne podliježu obavezi prijave koncentracije.

## **5. Relevantno tržište predmetne koncentracije**

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne osobine, kvalitet, uobičajenu namjenu, način upotrebe, uslove prodaje i cijene.

Nadalje prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Podnosilac prijave je kao relevantno tržište naveo, tržište veleprodaje odjeće i obuće obzirom da je privredni subjekt Atled kao Ciljno društvo registrovano za obavljanje navedene djelatnosti.

Iako su Delta Holding i povezana društva prisustni na teritoriji Bosne i Hercegovine ali na drugim relevantnim tržištima, dok Ciljno društvo ne djeluju uopšte na teritoriji Bosne i Hercegovine, kao relevantno tržište predmetne koncentracije u geografskom smislu je utvrđeno područje Bosne i Hercegovine, prema prijedlogu Podnosioca prijave.

Slijedom iznesenog relevantno tržište predmetne koncentracije je tržište veleprodaje odjeće i obuće u Bosni i Hercegovini.

U pogledu tržišnog učešća učesnika koncentracije, Podnosilac prijave navodi da navedena koncentracija nije usmjerena na relevantno tržište Bosne i Hercegovine, jer učesnici koncentracije uopšte ne djeluju na navedenom tržištu, uključujući i povezana društva u Bosni i Hercegovini koja isto nemaju nikakav uticaj na relevantno tržište jer se bave potpuno drugačijim djelatnostima. U prilog navedenom je i da Ciljno društvo se duži niz godina ne bavi registrovanom niti bilo kojom drugom djelatnosti i ne ostvaruje nikakve prihode.

Iz navedenih razloga, Podnosilac prijave navodi da s obzirom je tržišno učešće učesnika koncentracije i povezanih društava na relevantnom tržištu Bosne i Hercegovine 0%, nije moguće ni procjeniti ni tržišno učešće glavnih tržišnih konkurenata.

Shodno tome, nakon provođenja predmetne koncentracije privredni subjekat Delta Holding će na relevantnom tržištu Bosne i Hercegovine imati tržišni udio 0%.

Na osnovu naprijed navedenog, utvrđeno je da podnosilac Prijave nije bio obavezan podnijeti prijavu koncentracije u smislu člana 14. stav (1) Zakona, te je odlučeno kao u dispozitivu.

## **6. Administrativna taksa**

Podnosilac Prijave na ovaj Zaključak, u skladu sa članom 2. Tarifni broj 108. tačka c) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", br. 30/06, 18/11 i 75/18) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

## **7. Pouka o pravnom lijeku**

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Zaključka.

**Predsjednica**

**Adisa Begić**